

Kes bankrap tinggi cetus persoalan tahap literasi kewangan rakyat



Oleh Prof Madya Dr Ahmad Zubir Ibrahim
bhrencana@bh.com.my

Sukar untuk menafikan rakyat masih terkesan dan terjejas dengan kenaikan kos sara hidup walaupun terdapat petunjuk ekonomi negara semakin stabil.

Jika dilihat dari sudut makro, kadar inflasi menunjukkan penurunan dan terkawal dengan melalui dasar fiskal dilakukan kerajaan.

Namun, jika diamati di peringkat mikro, kesan ketidakstabilan ekonomi masih dirasakan setiap penduduk, khususnya golongan berpendapatan rendah atau B40 termasuk sebahagian M40.

Ia ditambah pula dengan kenaikan kadar dasar semalaman (OPR) kepada 3.0 peratus, secara tidak langsung mengubah corak perbelanjaan isi rumah.

Dalam erti kata lain, peningkatan OPR secara langsung mengurangkan kuasa beli isi rumah. Laporan Indeks Harga Pengguna (IHP) memperlihatkan inflasi mereda kepada 3.3 peratus pada April lalu berbanding bulan sama 2022.

Secara keseluruhan inflasi bagi tempoh Januari hingga April 2023 menunjukkan peningkatan 3.5 peratus berbanding 2.2 peratus pada tempoh sama pada 2022. Sehingga April lalu, komponen makanan di luar rumah mencatatkan kenaikan lebih rendah kepada 8.1 peratus berbanding Mac 2023 (8.6 peratus).

Perkara ini di dorong pendekatan dan pelaksanaan Menu Rahmah menawarkan makanan siap masak pada harga RM5 dan ke bawah.

Kesan daripada peningkatan kos sara hidup mengakibatkan inflasi bagi kumpulan pendapatan di bawah RM3,000 meningkat 3.4 peratus daripada 126.4 pada April 2022 kepada 130.7 pada April 2023. Pada masa sama inflasi di bandar dan di luar bandar menunjukkan peningkatan 3.3 peratus dan 2.6 peratus pada April 2023 berbanding bulan sama 2022.

264,127 kes kebangkrutan sehingga April lalu

Sementara itu, sehingga April lalu, sebanyak 264,127 jumlah kes kebangkrutan ditadbir Jabatan Insolvensi. Dalam tempoh 2019 hingga April 2023, sebanyak 13,073 kes bankrap (38.40 peratus) dalam kalangan umur 35 hingga 44 tahun.

Sebanyak 9,112 kes (26.77 peratus) pula antara usia 45 hingga 54 tahun dan 18.63 peratus (6341

kes) bagi golongan usia 25 hingga 34 tahun.

Kebanyakan kes kebangkrutan berpunca daripada kegagalan melunaskan bayaran pinjaman, terutama pinjaman peribadi (16,755 kes), pinjaman perniagaan (5,806 kes), sewa beli kenderaan (3,782 kes), pinjaman perumahan (2,818) dan hutang kad kredit (2,162 kes).

Jumlah kes kebangkrutan ini menimbulkan kebimbangan mengenai kesejahteraan hidup masyarakat. Adakah perkara ini terjadi disebabkan kurang ilmu pengurusan kewangan diri atau masyarakat mengamalkan gaya hidup keterlaluan.

Walaupun apa pun alasannya, masyarakat harus tahu dan faham hala tuju jelas dalam menentukan di antara keperluan, kehendak dan gaya hidup. Perkara ini harus diberi perhatian dan keutamaan bagi mengelakkan mereka terhumban dalam kebangkrutan.

Literasi kewangan dilihat sebagai satu mekanisme perlu dilaksanakan di semua peringkat ketika ini dan masa depan. Ia harus digarap dalam silibus atau kurikulum pendidikan di sekolah atau pengajian tinggi.

Ia perlu didedahkan dan ditambah baik bagi memberi pendedahan dan mengelakkan generasi akan datang mudah terperangkap dalam kadar keberhutangan tinggi.

Sikap mudah terpengaruh dan tidak dapat membezakan di antara keperluan dan kehendak menyebabkan golongan ini terperangkap dalam situasi mudah terancam yang akhirnya membawa kepada kebangkrutan.

“Masyarakat harus tahu dan faham hala tuju jelas menentukan di antara keperluan, kehendak dan gaya hidup”